

La ARLeF i scrîf a Ursula Von der Leyen. “La Comission europeane e à di tutelâ lis lenghis minoritariis”

La Agenzie e sosten la iniziative trasversâl proponude in Consei regionâl dal conseîr Diego Bernardis in supuart dal “Minority SafePack”. Si môf ancje la NPLD – la Rêt europeane des minorancis linguistichis.

La Comission europeane e à tornât al mitent lis domandis fatis dal Minority SafePack, su iniziative di passe un milion di citadins de UE, par dâ plui tutelis aes lenghis minoritariis. Une decision che e à lassât inmarumîts tancj di lôr e che è à fat movi no dome il Parlament european (che ai 17 di Otubar stâts al veve adotât, cun 524 vôtis a pro, cheste risolucion su iniziative dai citadins europeans), ma ancje il Consei regionâl dal Friûl - Vignesie Julie, in graciis di une mozion presentade vuê dal conseîr Diego Bernardis, e sostignude sedi di membris de maiorance che de oposizion.

«Nus displâs ricevi cheste rispueste de Comission. Si trate di une oportunitât pierdude – al à marcât Eros Cisilino, president de ARLeF - Agenzie Regjonâl pe Lenghe Furlane -. La tutele des lenghis minoritariis si realize su plui nivei, di chel locâl a chel european. La aprovazion dal Minority SafePack, promovude de FUEN, e varès sburtât inmò di plui chest sfuarç. Invezit si cjatìn cun passe un milion di citadins che si son zovâts di un strument di democrazie direte par dopo no jessi scoltâts; e la Cjarte dai dirits fundamentâi, che e previôt l'oblic di rispjetâ e di promovi i dirits des minorancis, no aplicade. Ancje nô o fasarìn rivâ la nestre proteste in vie uficiâl ae presidente Ursula Von der Leyen, tant che e domande la mozion presentade di pueste vuê ae Zonte regjonâl dal conseîr Diego Bernardis. Cheste posizion de Union europeane e fâs pardabon un dam ae vite democratiche de Europe e sul cont de fiducie des comunitâts minoritariis intes istituzions. O sperin che la Comission e mendi chest erôr e che ur dedi aes minorancis linguistichis la atenzion che a meretin».

A son une vore lis assembleis regjonâls che in Europe a son daûr a protestâ pe decision cjapade de Comission, e lu fâs ancje la NPLD, o ben la Rêt europeane des minorancis linguistichis, che la nestre Regjon e je un so membri. La NPLD e à cjapade posizion a difese dai dirits des lenghis minoritariis, invidant la Comission a modificâ la sô decision e a sodisfâ lis sperancis di chei citadins che a partegnin a comunitâts linguistichis minoritariis.

Udin, il 1ⁿ di Fevrâr dal 2021

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / e-mail: arlef@caltpr.it

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<